

国朝耆献类征初编

國朝耆獻類征初編

國朝耆獻類徵初編卷四百三十五目錄

文藝十三

沈志誠

史榮

曹亨時

曾孫維精
劉志士

桑繼德

陸錫疇

錢中盛

孫起棟

楊壘

吳敬梓

朱重慶

翁照

馬曰琯

弟曰璐

唐黼廷

方世舉

許燦

王榛

莫春暉

程紳
嗣嵐

俞珽

朱棟

刁戴高

袁璉

胡天游

施廷樞

盧存心

馬柏

國朝耆獻類徵初編卷四百三十五

通奉大夫前署江西巡撫江西布政使司布政使湘陰李桓輯

文藝十三

沈志誠

童子姓沈名志誠未有字先世注籍崇明五傳名道富遷嘉定安亭里祖名冕父名霖代以儒術聞童子周歲時聞誦讀聲欣然聽牽抱者衣立側注視四歲入塾塾師教以識字數日累千每一字必問象形指事會意諧聲讀大學聖經日修身爲本卽明明德爲本讀爲人孝弟章曰非孝弟不可爲人德業事功皆從此起讀孟子論性善曰性卽天理彼不盈此不缺也說理解經要言不繁五

歲讀六經三傳六七歲誦習周禮國語國策及史漢楚辭文選與夫唐宋八家文發爲經義頗有奇氣老蒼過之時歎服然恂恂自下不顧有神童稱幼嗣世父後世父早沒配未嫁守貞童子事嗣母孝一視本生父母嗣母及本生父母微疾頃刻不敢安嘗成小詩詩中誓欲顯揚其親待親黨款洽周至好濟人飢寒時告其父曰惠不在大此皆出於天性者壬申冬試於州遇風寒深得疾卒先是辛未歲試於學使者莊公日午成文才法略備時諸童呈卷求甄拔童子端坐案旁無一言公器重之欲列之博士員旣復念遲之正令厚其養成其材姑俟之科試不意竟不及待也年九齡益棺日父母嗣母哭之慟幾不欲生遠近多神傷者州牧宋君嘉

令劉君崑令馬君舊嘗賞其文亦咨嗟累日癸酉歲童子父以狀來乞傳因撮其學行之大者傳之見志誠雖天可同於汪錡之勿殤者

論曰宋晏元獻七歲善屬文真宗以爲祕書省正字明李西涯四歲書徑尺字景帝抱置膝上作書後皆位宰執躋老壽志誠何有才而無命也古今人苑枯不齊如此耶及觀程純公次子五歲而夭公志其墓幾欲比之生知則又古今同一慨矣

右傳沈德潛撰

Blank manuscript area with vertical lines.

史榮

雪汀少卽喜爲詩當是時鄞之細湖多詩人大率出宗正庵之門
正庵詩本師法竟陵稍改其面目而未洗故步也雪汀稍悟其非
變而爲山谷已而又稍嫌其生澀又一變而爲玉川晚乃信筆不
復作意遂爲誠齋然其實學誠齋而失之者蓋雪汀之詩凡四變
而遇益窮才亦益落悲夫雪汀賦性狷然失之怪當其初年高視
一切善書法又善以篆雕花乳印石矜貴過甚里中黃戶部又堂
張河內萼山踵門求其篆及擘窠書雪汀望望然不荅然其所許
可則傾倒受役使不厭甚至藩溷之間皆爲題署下逮童僕亦爲
雕鐫故雪汀不輕過人一飯而亦有長日過從畱連滿志乃并其

人竟不自解何以得此於雪汀者最任氣一言不合輒成觸忤日
益蕉萃陷於非罪之縲絏者三以此去其諸生平生老友大半凶
終割席自顧孤另之甚乃忽託末契於年少但有登其門者無不
極口稱之里中昨暮兒以雪汀故謬謬少所可而今忽易與也由
是雪汀之門牆驟盛一唱十和丹黃無間於昕夕其欣賞淋漓真
覺所遇皆作者於是登其門者謂人不必學謂詩古文詞不必宗
傳謂流品不必裁量方言里諺皆供詩材雪汀兀兀手鈔爲同聲
集四十卷吾鄉吟社久替至是忽爭傳雪汀之詩派而雪汀之風
格乃驟衰雖然雪汀之生平實有可傷者雪汀雅精小學喜讀注
疏不肖唯阿先儒之說熟精十七史及文選其謬謬少所可也乃

其本色雖連蹇要不失爲畸士至於暮齒之頽唐盡棄所學殊非其意是惟予爲能知之雪汀頗憂予之非議之也故頻年希過予門間或傳其有後言者然予客遊歸或過省視之雪汀往往握手相視欷歔而無言嗚呼誰謂雪汀竟以垂老喪志哉雪汀所著有李長吉詩注幾三尺許其最自負者予弗甚許也風雅遺音以訂正毛詩古韵已行於世并其竹東集皆嘗索予序予未之應雪汀以是愠予諸之曰論定蓋有待也及予自粵歸而雪汀卒乃志之同甫之屬銘於水心也曰一言不覈吾當於虛空中擊子今讀水心之志併所序龍川集令人絕痛然正不諱同甫之短予文豈足望水心雪汀亦非同甫比然而東平西靡之樹未必不待此文以

國朝書院光緒二十三年
名四十三
瞑目九原可作尙據觚而聽之雪汀姓史名榮一名闕文字漢桓
世爲鄆人忠宣公之裔也曾祖某祖某父某娶某氏子某諸生先
卒孫某葬於某鄉之某原春秋七十有九其銘曰

鸞翮不可振狼疾不可瘳故人彈中聲爲君一洗磊砢勃窣之牢
愁

右墓版文全祖望撰

曹亨時 曾孫維精 桑繼德 劉志士

曹亨時字敏齋湖南興甯人早失恃事繼母王克盡孝養工爲文章自弱冠試有司輒冠軍提學稱爲國士乾隆壬申由廩生魁鄉薦平生博覽羣籍著書十種凡二百三十餘卷曾孫維精字仙洲舉人家故貧幼隨兄負薪爲業道經里塾門必釋擔拱立聽講領悟異羣兒塾師見而奇之問其故遂命從學經史百家寓目成誦爲文力宗先正隱居授徒士無遠近爭集門下性篤友愛歲脯所入與諸父兄共有無歷五十年囊無私蓄又桑繼德字懋昭零陵人雍正己酉拔貢與亨時同鄉舉幼穎異過人日可讀一錐書蓋以錐卓冊淺深而成誦也後需次知縣不及仕年四十六卒居心

仁孝不妄交人亦不輕談人過失一日爲門人授經至父母俱存
句哽咽不能言爲之罷講蓋痛自少失父母也子孫俱世儒業劉
志士字修甫安鄉人兄志騫究心理學志士乾隆甲午舉人博通
羣書才力尤豪放爲學政褚廷璋所賞拔著述凡四種行於世

右傳李元度撰

按曹先生亨時著有左氏貫十六卷古今法鑒錄小戎十藝一卷文選內篇十六卷

文選外篇六卷古文備法四卷劉先生著有春秋集解孔林墟墓辨古泮池詩

陸錫疇

茶塢姓陸氏諱錫疇字我田吳人也研北先生之子吳中臺榭甲天下而以水木明瑟園爲最竹垞先生所爲作賦者也其地當靈巖之上沙經始於徐高士介白而歸於陸氏竹垞最與研北善每游吳必下榻於是園故茶塢少而受教於諸尊宿長而學於義門先生其人伉爽卑視一切義門之學纘密從事於考据最精而茶塢不求甚解略觀大意於師門爲轉手然義門甚許之性剛苟所不可直斥之如狗及觀其詩則又柔腸麗句淵源西崑予嘗諧之曰君爲人不肖其詩性嗜客尤豪於飲而最講求食經吳中故以飲饌誇四方研北先生已盛有名至茶塢而益上每膳夫聞座客

有茶塢輒失魄以其少可多否也家居無日不召客一登席則窮晝繼夜雖括頸相對不厭予於酒戶亦頗爲朋輩所推然深畏茶塢之句畱不五日卽病往往解維而遂茶塢謂予曰是所謂以六千里而畏人者也坐是遂以好事落其家家愈落好事愈甚年來世故局促吳之富人多杜門謝酬應無復昔時繁華之盛而茶塢獨竭蹶持之顧此猶茶塢之小者生平篤於師友之誼義門身後遺書星散茶塢話及之必痛心其乞余爲之表墓也流涕讀之陶太常穉中茶塢之心友也亦流涕而請其志幽之文友朋急難無不濡首滅趾以從之特以力不能展其志時時仰屋而吁而亦竟以是焦萃而歿予之交茶塢也以祈門馬嶰谷一見卽傾倒嘗曰

謝山無終老山林理不知其言之不驗也予遊嶺外一病幾死病中夢過水木明瑟園與君坐紫藤花下啖蓴羹君復以酒困予予曰此伏波曳足壺頭時不復與君抗也醒而異之以爲傲幸生還一踐此景豈知茶塢已棄我而去乎茶塢卒其子尙少吾懼明瑟之徑有塵而竹林之鱸且記也茶塢年六十有四娶某氏子一某其卒也於揚州嶰谷爲之任其後事葬於某鄉之某原其銘曰四海論交不媿孔融坐上客常滿尊中酒不空一朝化去誰其其蒿里之懽悰

右墓誌銘全祖望撰

按金先生年譜遊嶺外在乾隆十七年